

Pieve

1. Localizzazione

Simu à l'intrata di u territoriu cummunale di Ghisoni, trà a cummuna di u Lugu di Nazza è quella di u Petrosu. Simu à 17 kilòmetri d'Aleria. Simu dunque in u core di l'antica Pieve di u Castellu cumposta da i Paesi di Ghisoni, u Lugu è u Poghju di Nazza, u Petrosu è Vezzani. D'altrò, u locu hà guardatu u nome di Pieve fine à oghje.

U locu hè cumpostu da piani duminati da una dolce cullina chjamata San Ghjuvanni è di un paisolu abbandunatu.

Hè situatu à l'intrata di a valle di Ghisoni, à u pedi di a stretta di l'Inzecca cù a Petra di u Castellu è di a sarra Scalaghjola, chì cunstituiscèghjanu una muraglia naturale infranchèvule.

Simu vicinu di a vengia di u Fium'Orbu, è correnu qualchi fiumicelli, cù duie fontane, dunque l'acqua c'hè à buzeffa !

U terranu hè rinumatu in Ghisoni per esse un veru Ghjardinu d'Eden. A terra hè ricca. Qui si piantava in i tempi granu, vigna, alivi, mele in abundenza.

U paisolu era occupata fine à guerra di u quattordici. Fù cumpostu da una dicina di case è un fragnu. Ma oghje, ùn si po più vede nunda, chì tuttu hè imbaditu da una machja bella zeppa.

2. A ghjesgia piuvanna di San Ghjuvanni

A u centru di stu circondu, sta una ghjesgia rumanica arruinata. Si chjama San Ghjuvanni. Hè stata a ghjesgia piuvanna di a Pieve di u Castellu, nanzu ch'ella fussi tramutata in Vezzani à a fine di u Medievu.

D'apressu à Gisèle Morrachini-Mazel a ghjesgia data di u novesimu seculu. Hè cumposta da un bastimentu di centu vinti ottu metri quadrati è di una absida. A ghjesgia hè bella arruinata, chì hè stata abbandunata à a fine di u medievu, e so petre funu impiegate per cunstruisce u paisolu vicinu, è u bastimentu fù trasformatu in un paghliaghju.

È po soprattuttu, u focu hè scorsu parachje volte, ancu quandu a ghjesgia era piena di paglia...

3. I Rumani è l'altri

Gisèle Morrachini-Masel, in u so tempu, avia trovu qualchì vestighe chì ci permettenu di pinsà à un'occupazione più vechja di u situ. Avia trovu petre tagliate d'un battisteru paleocristianu di u quartu seculu.

Di più tuttu u circondu hè pienu di teghje rumane (dolia). Si ne truvanu annat'à una superficie di trè ettare. Què permette d'affirmà chì ci era un'implantazione importante corso-romana. E teghje sò di u primu seculu è di a perioda imperiale. Emu trovu dinò ceraminiche venute d'Africa di u nordu, paesi attelli di l'imperu. Dunque u situ fù bellu integratu à u mondu rumanu. Di più si dice chì tra Pieve è Vezzani stava una strada romana, chì, passendu da Casa Pierraggi, ghjunghje fine à Aleria.

A dimensione di u situ, a so ricchezza, a so pusizione centrale in a pieve di u Castellu, permettenu a Gisèle Morrachini-Masel di affirmà chì Pieve puderia esse a città di Ptolemeu Keneston mai situata.

Infine, a u pedi di stu situ, ella hà vistu, è vi possu dì anc'eiù chì ci hè, un situ ancù più vechju cumpostu di grotte, di muri ciclopeani è d'una torra. Ma ad avà, tuttu què ferma à esse studià, sbulicà è scavà !